

De barmherzich Samariter

E Schriftgelehrter stellt sich uff
und frot: „Wie kumm ich do enuff?“
Er guckt zum Jesus, zeicht no owwe:
„Ich hätt gern`s ewich Lebe drowwe.
Was muss mer dodefor dann mache?“
„Les im Gesetz, do steh`n so Sache
wie: Lieb den Nächsten so wie dich!“
Der Schriftgelehrte wunnert sich:
„Is das alles? - Bleibt zu kläre,
wer denn jetzt mein Nächster wäre.“

De Jesus duht, wie ehr all wisse,
das, was die Leit kapiere misse,
gern im Gleichnis formuleere.
Un so äns woll mer jetzt mol heere:

E Mann, heit nennt mer so was Zocker,
hat Glick gehatt und geht ganz locker
mit sei`m ganze Spielgewinn
uff em Häämweg vor sich hin.

E Spitzbu hat das spitzbekumm,
hat e Abkerzung genumm
und sich am e Weizefeld
am e Obstbaam hinnerstellt.

Un als der Mann die Stell passiert,
do springt der Strauchdieb ungeniert
und blitzschnell hinner`m Baam hervor.
Ein Arm mit Knüppel schnell empor.
Un saust herab mit Urgewalt!
Der getroffene Spieler fällt
uff de Weg, rührt sich nicht mehr.
Der Lumpesack guckt hin und her:

„Kää Mensch zu sieh, das hat geklappt.
Jetzt dabber noch es Geld geschnappt.
Dann nix wie ab in Sicherheit.
Was juckt mich, dass do äner leit?“

Der arme Kerl is schun halb tot,
aus sei`m Kopp laaft`s Blut ganz rot.
Ach lieber Gott, schick Hilfe her,
am beschte e Sanitäter!

Gott heert es, dieses Stoßgebet,
doch schickt er net e Sanität-
ter, sondern, vielleicht besser gar,
e Parrer, der uff Dienstreis war.
Denn der wackre Gottesmann
darf net nur ää Gemeinde hann,
er muss, wie mer`s bei uns ach kenne,
vun äner zu de anner renne!

Doch was is das? Mer kann`s net fasse!
Er stiwwelt stur vorbei!
Der werd den doch net leie lasse?
Das darf doch wohl net sei!
De unser do vun Mackebach
hätt so was Bößes net gemacht!

Un schun is der Mann verschwunn.
Ach guck, do kummt de nägschte schunn!
`s is e Levit, so nennt mer die,
die abstammen vum alt Levi.
Die sinn gebildet, schunn immer g`wese:
Es hääßt jo: die Levite lese!

Der werd sich kümm`re um den Arme.
Das kann net annerscht sei!
Doch geht auch der ohne Erbarme
an dem Halbtote vorbei!

„Was juckt mich dann der Mann do newe?
Hann e Termin, so is das ewe!“

Der Weg am Weizefeld entlang
war schunn belebt, denn gar net lang
no dem Parrer und Levit
spielt e dritter Mann jetzt mit!

Un der kam aus Samaria
die war`n, laut Wikipedia,
bei de Jude schlecht geachtet,
mit Vorurteile schwer befrachtet.
Vun so äm kann mer sicherlich
net erwarte, dass der sich
um verletzte Jude mieht! -
Doch weit gefehlt, denn schun kniet
der Samariter newedran
und guckt sich die Verletzung an.

Er nemmt sei Halstuch, macht e Schlopp
und schunn is bandagiert de Kopp.
Fachmännich, däht mei Hausarzt sa.
Der is iwwichens heit auch da!
Er praktiziert und wohnt in Schopp.
Der kann a so e schöner Schlopp!

Weil's sellmols noch kää Handy gab
fer Hilfe beizurufe,
nemmt er den Kerle huckepack
und macht sich uff die Hufe
zum nägschte Baurehof am Weg.
Dort gäbt er`n ab uns saat: „Ich leg
noch Geld dezu, dass ehr ne pflege.“
Un dann zieht er seiner Wege.

„So, ehr liebe Schriftgelehrte,
wär schää, wann ehr jetzt wisse dehrte,
wer jetzt wem sei Nägschder war.
Ich denk mer doch, die Sach is klar!“

Die nicken all, sie hann's gerafft
un Jesus hat's mol widder geschafft.

Was war me'm Spitzbu iwwerhaupt?
Ei, denne hann se ausgeraubt,
halb dodgeschla - ja, das is bitter.
Jetzt waat der uff e Samariter.

Wie jedes Johr an dieser Stell
noch e Liedche dabber schnell.

Beim Refrain, das werd gelinge,
känne ner äfach *lala* singe.

Ein Fest der Nächstenliebe
(Ein Festival der Liebe)

Siehsch du emol äner
dem wo's ganz dreckich geht - ohoh
Siehsch du emol äner
der dei Hilfe erfleht - ohoh
Dann geh zu ihm rüwer
lass ne net so allä - ohoh
denn mit deiner Hilfe
kann er widder grad steh - ohoh

Ein Fest der Nächstenliebe
soll unser Streben sein
und alle die dabei sein woll'n
die lade mir gern ein
Ein Fest der Nächstenliebe
das braucht heit die ganz Welt
weil ohne Liebe gar nix zählt



Der barmherzige Samariter, Lk. 10, 30-35

Viel gucken heit nur noch
uff sich und uff's Geld - ohoh
un dodebei gäbt's so viel
Not uff e Welt - ohoh
Auch du kannsch doch helfe
es is niemals zu spät - ohoh
Wer annere helft
macht sich selwert e Frääd - ohoh

Ein Fest der Nächstenliebe
soll unser Streben sein
und alle die dabei sein woll'n
die lade mir gern ein
Ein Fest der Nächstenliebe
das braucht heit die ganz Welt
weil ohne Liebe gar nix zählt

Ohoh ...